



Inatsisartunut ilaasortaq,
Hans Enoksen
Naleraq
Maani/

§ 37 naapertorlugu apeqqummut nr. 90-2024-mut akissut

Inatsisartut suleriaasianni § 37-mi imm. 1 naapertorlugu aalisarnerq pillugu inatsisissatut siunnersuummut tunngatillugu Naalakkersuisunut apeqquteqarsimavutit. Apeqqut suliaasaqarfigisannit akineqartussanngorlugu innersuunneqarnikuuvoq.

Ulloq: 14-05-2024
Suliap normua: 2024 - 9287
All. nr. 24143050

1) Aalisarnermi inatsisip allanngortinneqarnissaani aqutsiveqarfik 47-mi (Upernavik) 2025-mi qaleralittassat tonsinngorlugit qanoq annertussuseqassappat?

Postboks 269
3900 Nuuk
Oqarasuaat (+299) 34 50 00
Fax (+299) 34 63 55
E-maili: apn@nanoq.gl
www.naalakkersuisut.gl

1-imut) 2025-mut TAC suli aalajangersarnerqanngilaq. Tamanna ukiup ingerlanerani kingusinnerusukkut suliarineqassaaq ilaatigut aqutsinissamat pilersaarussiaq suliarineqartoq naammassineqarniariapat. Suleqatigiissitaq Aalisarnermut Siunnersuisoqatigiinni ilaasortanit sinniisussanillu ilaasortaaffigineqartoq sinerissap qanittuani qaleralinniarnermi aqutsinissamat pilersaarummik suliaqaleruttorpoq taannalu ilaatigut aallaavigalugu ilisimatuullu ukiunut marlunnut tulliuuttunut siunnersuutaat juni naanerani saqqummersussaq aallaavigalugit TAC aamma aalajangersarnerqassaaq.

2) Aqutsiveqarfik Uummannami ukiumi nutaami tassa 2025-mi qaleralittassat tonsinngorlugit qanoq annertutigissappat?

2-mut) Apeqqut 1-imut akissut takuuk.

3) Aqutsiveqarfik Qeqertarsuup tunuani 2025-mi qaleralittassat tonsinngorlugit qanoq annertussuseqassappat?

3-mut) Apeqqut 1-imut akissut takuuk.

4) Aalisartut PNNP-imut ilaaniartut eqqarsaatigalugit, qaleralittassat pisassiissutissat niuerutigineqarsinnaanngorlugit qanoq agguanneqartassappat?

4a) Pisassaasa annertussusissaat tonsinngorlugit paaserusuppakka?

4)-mut PNNP-imut peqataasussanngorluni ikaarsaariarnissaq pinngitsaaliissutaannani nammineq aalajangigassamat pisassanik aalajangersimasunik PNNP-imut atugassanik illikartitsisoqarnikuunngilaq. Aalisartut tamarmik aqutsiveqarfimmit 47-mit PNNP-mut ikaarsaariarnissamik kissaateqartut Aalisarnermut Piniarnermullu Naalakkersuisoqarfimmut qinnuteqarsinnaassapput. Aalisartup nammineq pisassai ukiut kingullit tallimat ingerlanerani ukiuni pingasuni aalisarfiulluarnepaani pisarisimasat agguaqatigiissinneri aallaavigalugit aalajangersarnerqassapput. Aalisartoq PNNP-imut ikaarsaariapat paggatassanit pissai PNNP-it pisassaanut nuunneqassapput. PNNP-imut

ikaarsaariaraanni pisassiissutit amerlanerpaaffissaasa iluini nammineq kissaatit malillugit pisassanik pisisoqarlunilu tunisisoqartarsinnaavoq.

5) Ilumoorpa Naalackersuisunik oqaatigineqartoq PNNP-mut aalisartut ilanngunniangitsut qaleralinniarnermi paggatassanik pisassinneqassasut?

5-imut) Aap, PNNP-imut ikaarsaariarnissaq pinngitsaaliissutaanngimmat aalisarnertut paggatassanik aalisarusunnerlutik PNNP-imulluunniit ikaarsaariassanerlutik nammineq aalajangissavaat. PNNP-mut ikaarsaariarnissamik kissaateqartut Aalisarnermut Piniarnermullu Naalackersuisoqarfimmut qinnuteqarsinnaassapput. Qinnuteqarniannikkunik pisarneq malillugu akuersissummik paggatassanik aalisarnissamut tunineqassapput.

6) Paggatassanik aalisartussat qanoq annertutigisumik pisassinneqassappat, qanorlu naatsorsuutigineqarpat paggatassanik qaleralinniartussat qanoq amerlatigissanersut?

6-imut) PNNP-imut ikaarsaariarnissaq pinngitsaaliissutaanngimmat aalisartut PNNP-imut ikaarsaariarusuttut amerlassusaat missingerneqarsinnaanngilaq PNNP-imillu nuutassat annertussusissaat eqqarsaatigalugu aalisartut ataasiakkaat qaqittagaat apeqqutaasussaammata tonsit qanoq annertutigissaneri oqaatigineqarsinnaanngilartaaq. Aalisartut PNNP-imut ikaarsaariarusuttut amerlassusaat takkulu pisassaasa amerlassusaat apeqqutaassapput.

7) Paggatassanik qaleralinnik pisassat qanoq annertussuseqassappat Upernavimmi eqqaanilu?

7-imut) PNNP-imut ikaarsaariarusunnerluni nammineq aalajangigassaammat aalisartullu qassit paggatassiinertut aalisaannarusussanersut nalunarmat tamanna naatsorsorneqarsinnaanngilaq.

8) Paggatassanik qaleralinnik pisassat qanoq annertussuseqassappat Uummannami eqqaanilu?

8-mut) Apeqqutip arfineq aappaanut akissut takuuk.

9) Paggatassanik qaleralinnik pisassat qanoq annertussuseqassappat Qeqertarsuup tunuani eqqaanilu?

9-mut) Apeqqutip arfineq aappaanut akissut takuuk.

10) Qeqertarsuarmi, Aasianni, Kangaatsiami Qasigiannuanilu illoqarfiit taaneqartut nunaqarfittai ilanngullugit immikkut qaleralittassinneqassappaat?

10-mut) Massakkuugallartoq pilersaarutaanngilaq, taamaattorli sinerissap qanittuani qaleralinniarnermi aqutsinissamut pilersaarusiortussatut suleqatigiissitap suliai aamma apeqqutaassapput. Ilutigalugu tamakku nalunaarutit aqutugalugit aalajangersarneqarsinnaapput.

11) Qaleralittassanik pisassiinissami ukioq kingulleq 2023-mi 2024-milu qalerallit pisarineqarsimasut aallaavigalugit pisassiisoqassavaa?

11-mut) PNNP-imut ikaarsaariarnissaq kissaatigineqarpat ukiut kingulliit tallimat ingerlanerani ukiut pisaqarluarnerpaaffiusut pingasut aallaavigalugit pisassiisoqassaaq. PNNP-imut 1. januar 2025 ikaarsaarnissaq kissaatigineqarpat pisassat ukiuni 2019-2023 ukiuni pingasuni pisaqarluarnerpaaffigisat aallaavigalugit naatsorsorneqassapput.

Aaqqissuusaq pinngitsaaliissutaanngimmat aalisartut PNNP-imut qaqugukkulluunniit ikaarsaariarsinnaapput, 1. januar 2025-ilu nallertinnagu aalajangertariaqaratik. Taamaattoq ukiup naanerani kisimi ikaarsaariartoqarsinnaavoq.

12) Qaleralittassat biologit siunnersuinerat malillugu aalajangersaanerit ingerlanneqalissaappaat qaleralinnik aalisagartassiinissami?

12-mut) Apeqqut 1-imut akissut takuuk.

13) Aalisartut pisassinneqarnissaannik qaffasinnerpaamik pigisaqarnissamik 2,5% tamakkiisumik atuutissavaa imaluunniit malinneqassanngila?

13-imut) Tamanna qaffasinnerpaaffissatut kaammattuutaanngilaq. Pisassat amerlanerpaaffissaraat tassalu inuup ingerlatseqatigiiffiilluunniit pisassat piginnaasaasa amerlanerpaaffissaat. Aalisartut ineriartorusuttut pisassatik piginnaasaminnut naleqqussarsinnaavaat, taamaattoqli pisassanit 2,5% annertunerpaamik pigisarinnallaq. Pisassat amerlanerpaaffissaanut nutaanut ukiut qulit ingerlanerani ikaarsaariarnissaq periarfissaavoq. Taamaattoqli pisassat 2,5 %-imik amerlanerpaaffissalernerisigut aalisariutinik piginittut pisassaminnik tunisinissamik pinngitsaalineqarnavianngillat.

14) Aalisartut qassit aalisarunnaarnissaat qaleralinniarnermi PNNP killissarlu pisassaateqarnissami 2,5 % atulerpat naalakkersuisunik naatsorsuutigineqarpat?

14-imut) Qaleralinniartut ukiuni qulini ikaarsaariarfimmi 2,5 % atuutilerpat uninnissaat Naalakkersuisut naatsorsuutiginnngilaat.

15) Aalisarunnaartussat inatsisip allanngortinnerani aalisartut sulisartullu inuussutissarsiutaannik allamut nuutsinneqarnissaat atuutilerpat aningaasanik taarsiiffigineqassappat naalakkersuisunik?

15-imut) Naamik, PNNP-imut ikaarsaarnissaq nammineq aalajangigassaammat inuussutissarsiummut allamut ikaarsaariarnermi taarsiiffiginnittoqarnavianngilaq. Tassunga ilanngullugu oqaatigineqarsinnaavoq PNNP-imut ikaarsaariareernerup kingorna aalisarunnaartoqarpat pisassanillu tunisisoqarpat, taamaasiorneq aningaasannassutaasussaavoq.

16) Aalisartunut aamma PNNP atulerpat siornatigut pisisartakkatik angusinnaajunnaarpatigit isertitassaminnik annaassaqarnerat pillugu, soorlu angallatinik sillimmasersuinerit ingerlaannartussat akissaqartinneqartariaqarmata aningaasanik taarsiiffigineqassappaat?

16-imut) Aningaasartuutit matussusersinnaanagit aalisartoqarpat isertitassanut annaasanut taarsiisoqarsinnaanngilaq. Massakkut siunissamilu.

17) Aalisartumut ataatsimut akuersissut tunniunneqarpat, qaleralittassat PNNP malillugu ingerlaniarneqartunut qanoq annertutigissasut missiliorneqarpa?

17-imut) Apeqqutip aqqaneq aappaanut akissut takugiuk. Kissaateqartut tamarmik PNNP-imut ikaarsaarsinnaapput. Ukiumut 1 tonsinik, 25 tonsinik 40 tonsinilluunniit pisaqartarnej apeqquaatinnagu.

18) Pisuussutit aalisakkat inuiaqatigiit kalaallit pigisarigaat aalajangertinniarneqarmat, PNNP tunngavigalugu pisassiinermi aalisartut qanoq pisassaminnut akiliisinneqassappat?

18-imut) Aalisartup PNNP-imut ikaarsaariarnissani kissaatigiguniuk pisassat akeqanngitsumik pissarsiarissavai. Aalisariutitut tunngatillugu PNNP-it 2012-imi eqqunneqarnerani periutsit atorneqartut assigaat. Aalisartup pisarisinnaasaminit amerlanerusunik pisassaqalerusukkuni pisassanik aalisartunit allanit pisisariaqassaaq. Akigitinneqartussaq eqqarsaatigalugu niuerfiusumi akigitinneqartut apeqquataassapput.

19) Inatsisissami siunnersuummi § 27-mi allaqqavoq tunniussinerni pisassiinermilu aalisagartassanik akileeqquisiinnaallutik, tamanna ilumoorpa?

19-imut) Inatsisissatut siunnersuummi § 27 aqqutigalugu akuersissutinik tunniussisarnermi aalisarsinnaanissamullu akuersissuteqartarnermi akiliuteqartitsisalersinnaaneq Naalakkersuisunit periarfissiissutigineqarpoq. Aalajangersakkat aalisarnermut massakkut inatsisaasumi § 14 a-mi atugassarititaasunit aallaanerungaanngillat. § 14 a aqqutigalugu massakkut akiliisitsisoqarnej ajorpoq, inatsisissatillu siunnersuutip akuersissutigineqarnerata kingunerisaanik allanngortinneqalersaarani.

20) Aalisartunngorniat nutaat inuusuttut qanoq pisassinneqassappat?

20a) Tunineqassappat imaluunniit aatsaat qaleralittassanik piseqqaartassappat?

20-mut) Inuusuttup aalisartuusimanngisaannartup aqutsiveqarfik 47-imi qaleralinnialernissani kissaatigiguniuk paggatassiissutinik aalisarnissamik qinnuteqarsinnaavoq pisassiissutinilluunniit pisinissaq toqqarsinnaavaa.

Inussiarnersumik inuulluaqqusillunga



Kim Kielsen

Aalisarnermut Piniarnermullu Naalakkersuisoq